

INUIT ATAQATIGIIT

INATSISARTUNI



UPA 2015/72
18. marts 2015
Aaja Chemnitz Larsen

Uunga siunnersuut: Tarnimikkut nappaatilinnik kiffaangissusiaaneq allatigullu pinngitsaaliissummik iliuseqarneq pillugu Inatsisartut Inatsisaata allanngortinnera pillugu Inatsisartut inatsisaat nr. xx, xx. xxx 2015-imeersoq. (Pinngitsaaliissummik katsorsarneqarnermi eqqarsarfissinneqarneq, Napparsimasunut siunnersortinik atorfinitsitsisarnermi aalajangiinissamut pisinnaatitsineq, Maalaaruteqartarneq aamma eqqartuussivilersuussisinnaaneq)
(Peqqissutsimut Nunanillu Avannarlernik Suleqateqarnermut Naalakkersuisoq)

Nuannaajallannarpoq inuttaaqatitta ajornartorsiuteqartut atugarisaasa pitsanngorsaavigniarneqarnerat.

Inuit Ataqatigiit uani inatsimmi pineqartumi Tarnimikkut nappaatilinnik kiffaangissusiaaneq allatigullu pinngitsaaliissummik iliuseqarneq pillugu inatsisartut inatsisaata allannguutissatut siunnersuutit tapersersorpagut; isumaqaratta tarnimikkut nappaatillit pisinnaatitaaffii pitsanngorsaaffigineqassat. Uanilu pingaaruteqarpoq erseqqissaatigissallugu kiffaangissusiaaneq pinngitsaaliinermillu atuisarneq minnerpaaffimmiitineqartariaqarmata.

Inuit pisinnaatitaaffiinut pisussaaffigut naammassisimanerlutigit misissuisoqartariaqarpoq, soorlu tarnimikkut innarluutillit Innarluutillit pillugit konventionimi piumasaqaatinut naammassinnissimanersugut.

Kiffaangissusiaaneq pinngitsaaliinerlu tungaviatigut inuit pisinnaatitaaffiinut unioqqutitsipput, inuit kiffaangissuseqarnerannut kiisalu timikkut tarnikkullu innarlerneqannginnissaanut ataqqinninnissamut. Kiffaangissusiaaneq pinngitsaaliinerlu taamaallaat atorineqartariaqarput allamik aqutissaarutiivinnermi.

Siunnersuummi maalaartoqartillugu sukkasuumik suliarineqartarnissaat siunnerfigineqarmat iluarisimaarparput kiisalu tarnimikkut nappaatillit qaammatit arfinillit kingorna tikillugit aalajangiisoqareernerani maalaarsinnaatitaalermata.

Taamatut oqaaseqarluta uku allannguutissatut siunnersuutit tapersersorpagut, inatsisissatullu siunnersuutip Ilaqutariinnermut Peqqissutsimullu ataatsimiititaliami aappassaaneerneqannginnerani suliareqqaarnissaa innersuussutigissallugu.